

इवनिंग डोगरी न्यूज बुलेटिन

समे .18:15 Hrs

<><><><><><>

Headlines

1. प्रधानमंत्री नरेंद्र मोदी होंरें आखेआ जे सरकार इक आत्मनिर्भर भारत दे नजरिए कन्नै कम्म करा'रदी ऐ, ते एम.एस.एम.ई आर्थिक विकास च परिवर्तनकारी भूमिका निभांदे न।
2. जम्मू-कश्मीर विधानसभा च उपराज्यपाल हुंदे संबोधन पर धन्नवाद प्रस्ताव पर चर्चा शुरू होई।
3. सरकारै जानकारी दिती जे बक्ख-बक्ख मैहकमें च 32 जहार 474 असामियां खाली पेदियां न ते पिछले बरे अक्टूबर मगरा 3 जहार 727 असामिएं गी पुर करने लेई एसएसबी ते पीएससी गी भेजेआ गेआ ऐ।
4. सरकारै जानकारी दिती ऐ जे पिछले 2 बरे च 4 करोड़ 48 लक्ख सैलानिएं जम्मू-कश्मीर दी जातरा कीती, इन्दे च इक लक्ख 20 जहार विदेशी सैलानी ही, सैलसफा गी बढ़ावा देने लेई 35 करोड़ 8 लक्ख रपे खर्च कीते गे।
5. जम्मू-श्रीनगर राष्ट्रीय जरनैली शिड़क पर थाहरें-थाहरें पेदी ल्हास-पस्सिएं गी हटाने मगरा बता फंसी दी गड़डिएं गी आओजाई दी इजाजत दिती गई।

<><><><><><>

PM-Webinar

प्रधानमंत्री नरेंद्र मोदी होंरें आखेआ जे सरकार इक आत्मनिर्भर भारत दे नजरिए कन्नै कम्म करा'रदी ऐ। सरकारै सुधार दी गति च तेजी आहनी ऐ। प्रधानमंत्री होंरें आखेआ।

अर्थ बवस्था च एम.एस.एम.ई दे महत्व गी लेइयै मोदी होंरें आखेआ जे एम.एस.एम.ई मुख्य दे आर्थिक विकास च परिवर्तनकारी भूमिका निभांदे न। विकास, विनिर्माण, निर्यात ते परमाणु उर्जा मिशनं, विनियामक, निवेश ते कारोबार करने च सुगमता च सुधार करने दे तौर पर मोदी होर एम.एस.एम.ई खेतर पर बजट गी संबोधित करा'रदे हे। मुख्य च कारोबार गी सखल्ला बनाने ते इस भेठा सुविधा पजाने लेई कीते गेदे बक्ख-बक्ख उपाएं गी लेइयै मोदी होंरें आखेआ जे सरकार नै जन विश्वास अधिनियम दी अमलावरी कीती ते अनुपालन गी घट्ट करियै सखलला ते सौक्खा बनाइयै आयकर दी अवाधारणा पेश कीती गई। उनें आखेआ जे सरकार दुए जन विश्वास विधेयक पर कम्म करा'रदी ऐ।

<><><><><><>

Discussion-Motion of Thanks

जम्मू-कश्मीर विधानसभा नै अज्ज उपराज्यपाल हुंदे अभिभाषण पर धन्नवाद प्रस्ताव पर चर्चा शुरू कीती जिसी स्पीकर अब्दुल रहीम राथर हुंदे आसेआ पैहले सदन पटल पर रक्खेआ गोआ हा। मुबारक गुल हुंदे आसेआ सदन च रक्खे गोदे प्रस्ताव दा समर्थन गुलाम अहमद मीर होरें कीता। धन्नवाद प्रस्ताव दौरान बोलदे होई आखेआ जे लोकें इस सरकार गी भारी जनादेश दिता ऐ। इस दौरान उनें जम्मू-कश्मीर दा राज्य दा दर्जा बहाल करने बारै बी जिक्र कीता। उनें आखेआ जे जम्मू-कश्मीर दे राज्य दे दर्जे दी बहाली साहड़ा हक्क ऐ। तोआई गुलाम अहमद मीर होरें इस दौरान विधानसभा चुनाएं च बदी चढ़ियै हिस्सा लैने लेई लोकें दा धन्नवाद कीता। चर्चा च हिस्सा लैंदे होइ शाम लाल शर्मा होरें संस्थानें गी मजबूत बनाने ते एहदे लेई किट्ठे रलियै कम्म करने दा आह्वान कीता। इस दौरान डॉ. रमेश्वर सिंह होरें बी अपनी गल्ल आक्खी।

<><><><><><>

Vacancies

जम्मू-कश्मीर सरकारै अज्ज विधानसभा गी जानकारी दिती जे बक्ख-बक्ख सरकारी मैहकमें च 32 जहार 474 असामियां खाली पेदियां न। आकाशवाणी दे जम्मू संवाददाता नै जानकारी दिती ऐ जे हंदवाड़ा थमां विधायक सज्जाद गनी लोन हुंदे आसेआ पुट्टे गोदे सवालें दे लिखित च जवाब दिंदे होई मुखमंत्रि उमर अब्दुल्ला होरें एह जानकारी दिती। एहदे मूजब 31 जनवरी 2025 तगर बक्ख-बक्ख सरकारी मैहकमें च कुल 32 जहार 474 असामियां खाली पेदियां न जिंदे चा 2 जहार 503 गजटेड असामियां, 19 जहार 214 नान गैजटेड असामियां ते 10 जहार 757 एम.टी.एस असामियां खाली पेदियां न। सरकारै मूजब 16 अक्टूबर 2024 थमां लेइयै हूनै तगर 3 जहार 727 खाली पेदी असामियें गी पुर करने लेई जे.के.एस.एस.बी ते पी.एस.सी गी रैफर कीतियां गोइयां न जिल्लै उमर अब्दुल्ला हुंदी अगुवाई च चुनी गेदी सरकार नै शपथ लैती ही। इन्दे चा 738 गजटेड पोस्टां न। 1 जहार 754 नान गैजटेड ते 1 जहार 235 एम.टी.एस पोस्टां न।

<><><><><><>

Tourism

जम्मू-कश्मीर विधानसभा दे बजट इजलास दे दुए ध्याड़े अज्ज सैलसफा पर बी चर्चा कीती गई। इस बारै जानकारी दिंदे होई सरकार नै आखेआ जे पिछले 2 बरें दौरान केंद्र शासित प्रदेश जम्मू-कश्मीर च 4 करोड़ 48 लक्ख सैलानी आए न जिंदे चा 1 लक्ख 20 जहार विदेशी सैलानी न। ईदगाह दे विधायक मुबारक गुल हुंदे आसेआ सोआल दा लिखित च परता दिंदे होई मुखमंत्रि उमर अब्दुल्ला जेड़े सैलसफा मैहकमे दे प्रभारी बी हैन, होरें जानकारी दिंदे होई आखेआ जे 2023 बरे च जम्मू-कश्मीर च 2 करोड़ 12 लक्ख सैलानियें दौरा लाया ऐ जिस्सलै के बरे 2024 च 2 करोड़ 36 लक्ख सैलानियें दौरा लाया ऐ। इन्दे चा 2023 बरे च 55 जहार 337 बाहरले देसै थमां आए दे हे ते 2024 च 65 जहार 452 विदेशी सैलानियें जम्मू-कश्मीर दा दौरा लाया हा। मंत्री होरें अग्गे गलाया जे मुल्ल भरै थमां बरे 2023 च 2 करोड़ 11

लकख सैलानी जिस्सलै के पिछले बरे 2024 च 2 करोड़ 35 लकख सैलानियेँ मुख्य भरै थमां जम्मू-कश्मीर दा दौरा कीता हा। मंत्री होरें एह बी जानकारी सांझा कीती जे पिछले 2 माली बरें दौरान सैलसफा मैहकमे आसेआ प्रचार, विज्ञापन ते इस कन्नै जुड़ी दी गतिविधियेँ लेई 35 करोड़ 8 लकख रपे खर्च कीते गे'न।

<><><><><><>

Health

अज्ज विधानसभा च प्रश्नकाल दौरान सेहत सरबन्धी मामलें पर बी चर्चा कीती गई जेदे च सरकारै आसेआ जानकारी दिती गई जे जम्मू-कश्मीर च हर 3500 लोकें लेई इक सेहत इदारा ऐ जिल्लै के मुख्य भरै च हर 6 जहार लोकें पर इक सेहत इदारा ऐ। विधायक रियाज अहमद खान हुंदे आसेआ पुट्टे गेदे सवाल दा सेहत मंत्री सकीना इतू होरें लिखित च परता दिता। उनें जानकारी दिती जे केंद्री सेहत मंत्रालय आसेआ प्रकाशित इक रिपोर्ट मूजब जम्मू-कश्मीर च हर 3500 लोकें लेई इक सेहत इदारा ऐ जिस्सलै के 6 जहार लोकें लेई इक सेहत इदारे दी राश्ट्रीय औसत थमां मता बेहतर ऐ। उनें एह बी जानकारी दिती जे भविकख च सेहत केंद्रें दा निर्माण या उंदा दर्जा बदाने दी इस्सलै कोई योजना नेई ऐ।

<><><><><><>

Walkout

पीपल्स कांफ्रेंस दे अध्यक्ष दे हंदवाड़ा थमां विधायक सज्जाद गनी लोन होरें अज्ज विधानसभा थमां वॉकआउट कीता कीजे उन्दे आसेआ दफा 370 लेई संशोधन दे प्रस्ताव दे अलावा जम्मू-कश्मीर दे बाहरें जेलें च बंद ते हिरासत च रक्खे गेदे लोकें गी जम्मू-कश्मीर वापस आहनने बारै प्रस्ताव गी आहनने दी अनुमति नेई दिती गई। आकाशवाणी दे जम्मू संवाददाता नै जानकारी दिती ऐ जे प्रश्नकाल समाप्त हुंदे गै विधायक होरें विधानसभा दे अध्यक्ष राथर होरें गी अनुमति नेई देदने दे कारणेँ बारै पुच्छेआ। स्पीकर होरें आखेआ जे इनें प्रस्तावें गी सदन गी चलाने सरबन्धी नियम-कायदें तैहत इनें प्रस्तावें गी मंजूरी नेई दिती गई ऐ।

<><><><><><>

Highway

जम्मू-श्रीनगर राश्ट्रीय जरनैली शिड़क थवां ल्हास-पस्सियां, कुप्पड़ हटाने मगरा बत्ता फंसी दिएं गड़डिएं गी जाने दी इजाजत देई दिती गई ऐ। एसएसपी ट्रैफिक रोहित बसकोत्रा होरें दस्सेआ जे दलवास, मेहर ते शेर बीबी थाहर पेदी पस्सिएं गी हटाया गेआ। राश्ट्रीय जरनैली शिड़क सोमवार संझा थवां गै बंद ही। एह शिड़क भारी बरखा ते थाहरें-थाहरें ल्हास-पस्सियां पौने करी बंद होई गेदी ही। इस करी जम्मू ते कश्मीर बश्कार राबता बाधित होई गेआ। शिड़क पर यातायात बहाल करने दा कम्म पैहल दी विनाह पर कीता गेआ तां जे बत्ता फंसी दिएं गड़डिएं ते जरूरी चीजेँ-बस्तें आहली गड़डिएं दी आवाजाई बहाल होई सकै।

प्रशासन नै यात्रुएं गी सलाह दिती ऐ जे ओह यात्रा शुरू करने थवां पैहले मौसम दी ताजा जानकारी लेई लैन। होर जानकारी दिंदे होई एसएसपी ट्रैफिक रोहित बसकोत्रा होरें आखेआ।

<><><><><><>

Bikers Rally Poonch

नशीले पदार्थे दे माड़े असर बारै जागरूकता पैदा करने दे मकसद कन्नै पुंछ दे डिप्टी कमिशनर विकास कुंडल होरें पुंछ दे डाक बंगले थवां 15 महिला बाइकर्स दी रैली गी झंडी दस्सियै रवाना कीता। इस रैली गी नशा मुक्त भारत दा नाएं दिता गोआ ऐ। एहदा मकसद युवाएं गी नशीले पदार्थे दे सेन थमां होने आहले नुकसान, खतरे बारै जागरूकता पैदा करना ते समाज गी नशामुक्त बनाना ऐ। इस कार्जक्रम दा सरिस्ता जिला समाज कल्याण मैहकमे आसेआ कीता गोआं एहदे च महिला मोटर साइकिल सोआरें इस रैली लेई खास उत्साह जाहिर कीता। एह रैली कस्बे ते आले-दोआले दे इलाकें थवां लंघोग। इस दौरान नशे दे माड़े असर ते एहदी रोकथाम बारै जानकारी फैली जागं इस बारै होर जानकारी दिंदे होई पुंछ दे डिप्टी कमिशनर विकास कुंडल होरें आखेआ।

<><><><><><>